



Faint, illegible text, likely bleed-through from the reverse side of the page. The text is arranged in several lines and appears to be in a historical script.



E
Eucharii Eleutherii

21.
22
FAX MAGDEBUR-
GICA.

Das ist:

Die Magdeburgische
WeltFackel/

Allen Evangelischen Städten vnd Stän-
den in Teutschland zur Warnung angezündet / sich
dabey wol umbzusehen / benebenst etlichen vorhergehenden
Motiven was den Herrn Administratorem verursacht sich in selbige
Stadt zu begeben. Darbey vnpartheyische Specialia zu befinden/
wie es in der Stadt in wärender Belagerung/ auch
bey der Zerstörung zugegangen.

Mit angehengter erbärmlichen Klage vnd letzten
Testament der Magdeburgischen Damen/

Im Thon:

Ach D R X mich armen Sünder/ etc.



Gedruckt im Jahr / 1632.

Incham Ebenen

FAXMAGDEBUR-
GICA

Das ist:

Die Magdeburger
Bibel

Allein geschickten
den in demselben die
haben und nicht
Mitten unter den
Es ist in der
den

Die angedeutet
zum

Im Jahr

des

1522

Gedruckt in
1522





Dennach der Hochwürdigste Durch-
lauchtigste Hochgeborne Fürst vnd Herr/
Herr Christian Wilhelm/ des Primats/ auch
beyder Erbs- vnd Stifter Magdeburg vnd
Halberstadt / postulierter Administrator/
Marggraf zu Brandenburg/ in Preussen etc.
Herzog / etliche Jahr lang diese Stifter von aussen ansehen/
viel Ungemachs vnd Gefahr in aufwertigen Landen aufstehen
vnd endlich erfahren müssen / welcher Massen man benimpfte
Stifter gänzlich einzunehmen / das Exercitium Evangelis-
cher Lehre darinnen abzustellen / vnd dagegen des Pappsts Gre-
wel einzuführen sich vnterstünde / in massen dann die allbereit
öffentlich angeschlagene Edicta vnd Mandata besaget haben.
Derowegen so haben Ihr S. Gn. sich der Capitulation vnd
Pflicht die sie ihrer getrewen Landschaft gethan / erinnert vnd
mit etlichen Patrioten/ die es mit Ihrer S. Gn. dem Erbs Stifte
Magdeburg/ mit der Evangelischen Religion / vnd dessen all-
gemeinem Wesen / vnd zuförderst auch mit der Stadt Magde-
burg gut gemeynet/ Correspondentz gepflogen/ da sie sich dan
endlich resolviret, weil nunmehr in der Güte bey den Catholi-
schen nichts zu erhalten were / ein hafart zu wagen / in Hoff-
nung / weil man Ihrer Fürstl. Gn. gute assistenz zu leisten/ so
wol vffm Lande als in der Stadt/ vertroöstung gethan/ auch daß
die Königl. Mas. zu Schweden / sie endlich succurriren, vnd
derowegen mit Hülffe beyzuspringen nicht vnterlassen würden/
in Zuversicht stehende/ es würden die Evangelischen Stände/
denen allerseits viel an diesem Werke vnd Pässe gelegen/ sich
der Sachen annehmen / vnd es zu einem guten Ende bringen
helffen.

A ij

Als

Als aber ihre F. Gn. naher Magdeburg kommen/ haben sie zwar anfangs der Bürgerschaft Herzen vnd Gemüther zimlich gut befunden/ auch vom Rathe allerhand gute Vertröstung erlanget/ doch aber bey weitem nicht entpfunden/ wie deroselben vorhero ware vorbracht worden / durch wen aber / das stehet zu eines jeden Verantwortung. Dieweil aber die Sache angefangen/ vnd J. S. G. ohne höchste Gefahr vnd Schimpff aus der Stadt nicht wol wieder kommen können / ist endlich nach vielen bedenklichen Motiven vnd Tractaten, die allhier zuerzehlen viel zu lang seyn wolten/ eine erklärang erfolgt/ daß man J. S. G. so viel möglich bespringen wolte / so ferne der Königl. Schwedische Succurs, vermöge der gewissen Vertröstung/ die der Ambassator Johann Stallman dem Rathe vnd der Stadt gethan / sich balde einstellen / vnd seinem Vorgeben nach / die Hansee Städte / als der Stadt Magdeburg Mitglieder / diese hochwichtige Sache zum guten Ende würden bringen helfen.

Anff solche Vergleichung vnd mehrerley auffgerichtete Capitulationes ist das Werck angefangen worden/ welche Capitulationes dann/ wie zu vormuthen/ vff weit mehrern Privilegiis mögen bestanden seyn/ als sich sonst der Stadt Gerechtigkeiten von alters hero erstreckt haben. Inmassen an der vbergabe der Newstadt vnd Sudenburg nebenst etlichen Geislichen Gütern/ die sonst vor sich / oder der Erzbischofflichen Tafel gewidert/ zu sehen gewesen. Es ist zwar eine bedenkliche Sache/ von eines außwertigen Potentaten (der des Reichs matricul nicht einverleibet/ vnd deme man vff des Reichs Bodem nichts gestehen wil) Commissario Privilegia anzunehmen/ vnd von dem rechten Haupte zu wancken: Aber wenn es Gott also gefellig gewesen/ hette es weder der Keiser noch der Papst mit allen Jesuiten umbstossen können / muß derwegen seiner Allmacht heimgesellet bleiben. Aber man hat damit also fort die Röm.
Keiserl

Keiserl: Maj. hoch offendiret, warumb sie derofelben Armee/
vnd zufforders dem Herrn General Tilli/ der ohne das embsig
in reformationen Sachen ist/befohlen/sich nicht zu seumen/die
Stadt mit Gewalt zu attaquieren vnd zum Gehorsam zu bring-
gen. Da es dann endlich zu einer solchen harten Belagerung
kommen/vnd gemelter Herr General mit ganzer Macht da-
für gerücket.

Ob nun wol S. Excellenz einen grossen Ernst dafür gebrau-
chet/so hat er doch in geraumer Zeit nicht viel außrichten können/
wegen guter Gegenwehr vnd stetigem Auffallen der Soldaten/
also daß es sich lenger/denn Er verhoffet / damit verzogen. Hat
entlich seinen General Adjutanten mit Schreiben an den
Graffen von Pappenheim in sein Quartir nahe Berleben
geschicket/ daß er auff seiner Post gegen der Newstad solte fort-
fahren/ sintemahl Ihr Königl. Maj. aus Schweden / wie er
aus beyligenden intercipirten Schreiben vernehmen würde/
in vollem March were / die Stadt zu entsetzen / so weren auch
die Evangelischen Fürsten im Reich/ in starcker Verbundung/ we-
re sonder zweiffel auch auff Magdeburg dieselbe zu entsetzen an-
gesehen: welcher Adjutante dann von den Reutern aus der
Stadt vnversehens gefangen/vnd mit den Briefen hienein ge-
bracht worden/ in welchen Ihre Königl. Maj. der Stadt zu ge-
schrieben vnd versprochen / so wahr als er ein König von Ehren
were / er wolte sie nicht lassen / vermeynende aber nimmer-
mehr/daß es so falsch in der Stadt hergehe / der Allemannische
Sahnen sich so weit solte außgebreitet haben / vnd kein besser
Auffsicht auch von denen/ so es gebühret / geschehen/ vnd solche
Sicherheiten daraus erwachsen seyn würden.

Der Feind aber hat vnter dessen / mit approachiren starck
fortgeeilet/vñ mit schiessen aus dem groben Geschütz/die Thum-
Thürme vnd andere Gebäude vbel zugerichtet vnd beschädiget/

bis vff den 7. Maij alten Calenders / da Er dann angefangen / die Stad an den zweyen schmalen örthern / nemlich der Sudenburg vnd Newstad / mit gewalt zu beschüssen / von acht Bateriaen / als 3. vor der Sudenburg / drauff 10. halbe Carthaunen / 3. in der Newstadt / darauff 8. halbe Carthaunen gepflancket / vnd 1. vber der Elbe mit 8. halben Carthaunen besetzt gewesen / vnd dann noch von einer Battery vorn Zoll / hat man mit fünff etwas kleinern Stücken / vff das neue Werck vff dem Marsch gebawet / ohne Vnterlaß gespielt / vnd hat solch schiessen / den 7. 8. vnd 9. Maij Tag vnd Nacht gewäret bis den 9. nach Mittage / da sie inne gehalten / vnd nicht mehr geschossen / vnd seind etliche tausend Schüsse gezehlet worden. Sie haben aber damit doch nicht viel außgericht / sintemahl sie in den Heideck ein Bollwerck nach der Sudenburg gelegen eine Kugel auff die ander geschossen / die darinnen stecken blieben / daß das Werck nur dovon fester worden.

In der Newstadt haben sie verimehnt / den Thurm vff der hohen Pforten in den Graben zu fällen / vnd denselben damit außzufüllen / so aber auch nicht geschehen / denn er den 9. hujus ist seitwärts auff den Wall gefallen / vnd hat ein alt Kundel an dem Graben außgefüllet. Vber der Elbe hero / haben sie die Mauer an dem Zwinger zerschossen / aber den Wall nicht beschedigen können. Vnd ob sie gleich auch vnter dessen / etliche hundert Feuer Kugeln vnd Granaten in die Stad geworffen vnd geschossen / ist doch weder Mensch noch Haus darvon beschediget / auch von dem grossen schüssen aus den Stücken nicht mehr als zwey Personen / ein Mann vnd ein Fraw / die zur Kirchen gehen wollen / erschossen worden / vnd sonsten auff dem Wall von Bürgern vnd Soldaten mit Musqueten in die sche oder neun Persohnen.

Diweil nun den 9. Maij nach Mittags die Keiserlichen
mit

mit dem schießen ganz stille worden / vnd innen gehalten / vnd man gesehen / daß sie bey der Sudenburg etliche Stücke abgeföhret / hat man in der Stadt vermeynet / der Feind würde wegen des ankommenden Schwedischen Volcks abziehen / vnd seind darbey noch sicherer worden / jedoch die folgende Nacht vber die Wacht sehr wol bestellet / Denn die ganze Soldatesca neben der Bürgerwach / auch die Reuter / die mit ihren Pistolen vnd Pandeliren jederzeit sich willig auff dem Walle finden lassen / vnangesehen sie gleich andern Soldaten bey den Bürgern kein Quartier haben können / die ganze Nacht vber wachsam gewesen. Vnd weil der Feind sich stille bezeiget / sind sie den Morgen fünff Uhren von dem Walle nach Hause gegangen / vnd sich etwas zur Ruhe begeben / aber diese Stilligkeit hat sie betrogen / vnd weil dem Feinde der eigenen Bekantnis nach / alles ist verkundschaftt gewesen / ist also bald nach 7. Uhren der Sturm anzufangen befohlen worden.

Es wil aber gleichwol allhier vnd zuvorhero ein wenig vom Vhrsprung der Sicherheit vnd Verräterey erinnert seyn. Nemblich / es hat der General Tilli etliche Tage zuvor mit einem Trompter Schreiben / an Ihre Fürstl. Gn. den Herrn Administratorn / desgleichen an den Rath / vnd auch an Falckenberger haltende / vberschiebet / darinnen Er sich als ein listiger Fuchs / einer milden Capitulation erbeuth: Worauff sich Ihr Fürstl. Gn. so wol auch der Rath erkläret / sie wolten solches an Ihre Glaubensgenossen / vnd zupörderst an die Churfürstl. Durchl. zu Sachsen gelangen lassen / der würde vielleicht als ein Nachbar vnd Friedliebender Interponent diese Sache zu einem guten Stande richten helffen / daß die Röm: Keis: Maj. damit allergnädigst würde zu frieden seyn können. Vnter dessen verhofft man in der Stadt / es würde ein Stillstand der Waffen gebrauchet werden. Aber auff gedachtes Herrn Generals
Schrei-

Schreiben / ist noch mehr Sicherheit in der Stadt erfolgt /
vnd haben die Verräther solches zu ihrem Vortheil wol zu ge-
brauchen / vnd ihnen wegen des Tilli vertrösteten Gnaden
noch mehr von der Bürgerschaft anhengig zu machen wissen /
wie dann auch Aleman der Verräther öffentlich an seine Vere-
wandten vnd Helffersgenossen zu schreiben nicht unterlassen.
Es hat aber der Herr General Tilli / diese der Stadt resolu-
tion sampt dem Trompter fast 8. Tage bey sich behalten / vnd
vnter dessen mit dem approachiren nicht gefeiret / dabey denn der
Verräther nicht geschlaffen / möchte auch dem Tilli nicht gele-
gen seyn / daß man mit Chur Sachsen hieraus viel communi-
ciren, vnd darüber die Zeit verlieren solte / denn die Leipziger
Zusammenkunft / vnd die pretension des Churfürsten Herrn
Sohns am Erbsitze war ihm etwas verdächtig vnd nach-
dencklich / hat sich doch endlich 4. oder 5. Tage vngesehr vor der
Zerstörung hinwiederumb erkläret / daß solches nunmehr zu
spat were / vnd darauff mit Macht der Stadt zugesetzt vnd kei-
ner lengern resolution erwarten wollen / welche anderweite re-
solution doch ebendesselben Tages / da die Stadt eingenom-
men worden / zum Herrn General hat sollen geschicket werden /
wie dann der Secretarius dieselbe vffs reine gebracht / vnd noch
daran geschrieben / als die Soldaten des Feindes schon die
Thumprobsten / da des Herrn Administratoris Losier gewesen /
zuplündern angefangen. Vnd weil es dann also hat sollen vnd
müssen gestürmet seyn / so ist es mit folgender ordre angestellet
gewesen.

Der Grafe von Pappenheimb nebenst den Cronsfeldis-
schen / Wanglerischen vnd Savellischen Regimenten / solten
das grosse neue Werck vor der Newstadt / darauff denn allbereit
in die hundert Leitern angeleinet gewesen / anfallen / welches aber
Herr Salckenberg nicht groß geachtet / die weil sie zu kurz wa-
ren /

ren/vnd kaum den dritten Theil des Walles erreicheten / vermeynende es were nur zum Schrecken geschehen. Der Herzog von Hollstein / das Hornwerck vor dem Kröcken Thor. Graf Wolff von Mansfeldt mit dem Tillschen Volcke den Heideck / vnd drey Keyserische Regimenter neben etlichen Tillschen / solten das neue Werck vff dem Marsch zwischen der Brücken vnd dem Wasser angreiffen / vnd sollte der Sturm also zugleich / wenn man das Geschütze lösen würde / an allen vier Orten angehen / das doch nicht geschehen / auch nicht geschehen können / weil gar keine Presh an keinem Orte geschossen / vnd die Graben nicht aufgefüllt gewesen.

Der Pappenheim aber hat an seiner Post einen grossen Vortheil gehabt / nemlich einen truckenen Graben / keine Brust noch Streitwehre am Wall / auch der Wall so thalhenckend / daß man gar leicht vber die Leitern hat können hinauff lauffen. Diweil dann nu diß Werck gar vbel verwahret / vnd eben zu der Zeit dieselbe Post mit Volck fast nicht versehen war / welches dem Grafen von Pappenheim / seiner eignen Bekänntnis nach / durch die Verräther ihres Vaterlandes / ihrer Weib vnd Kinder / Ist kunt gethan worden / das vber 20. Soldaten nicht drauff weren / vnd auch von denenselben noch die meisten geschlaffen / ist das Werck leicht erstiegen vnd eingenommen worden. Vnd ob wol gleich etwan ein 15. Soldaten in der fossa brai gelegen / vnd sich gewehret / seind sie doch von den heuffig heran steigenden Keyserischen leichtlich vbermaniet vnd nieder geschossen worden / vnd so balde sie den Wall erreichet / haben sie die Geschütze gegen die Stadt umbgekehret / vnd die Thürme an der innern Mauer eingenommen / vnd auff die Gassen mit gewalt Feuer gegeben. Als nun Herr Falckenberg / so gleich auff dem Rathause gewesen / vnd mit dem Rathe etwas tractiret, solches erfahren / wie Er denn diese Post fast meistentheils
B selbst

selbst in acht genommen/ darauff sich die Bürgerschaft verlas-
sen/ vermeynende/ daß es so bald keine Noth daselbst haben wür-
de/ ist er in Eil hingeritten/ vnd etliche Musquetirer zusammen
gebracht / vnd mit dem Feinde/ so schon durch den Zwinger in
die Stadt kommen / scharmühret / ihn bis in den Zwinger zu-
rück getrieben. Weil Er aber am Volcke schwach/ vnd ihme
die Feinde zu mächtig waren/ ist Er (vielleicht ohne Bedan-
cken) an die Spitzen geritten / vnd von dem Feinde erschossen
worden/ dessen Körper hernach von dem Feuer ganz verbrennet
ist/ daß man von ihme nichts finden mögen. Dem lieben G. D. C.
sind alle Dinge bekant/ viel meynen zwar/ er were nicht zu ver-
werffen gewesen / wenn man vermercket hette / das es an dieser
Post/ wegen der schon angeleiteten Sturmleitern/ wie auch son-
sten so gefährlich sey/ daß man die Lücken vnd Gassen mit kurzen
Streichbüchsen mit Hagel geladen hette besetzen sollen / vor
welchen/ wie der Feind hernach selbst bekant / sie sich hoch be-
fürchtet hetten/ vnd ist ihre Meynung damals gewesen/ wann sie
nur auff den Wall kommen könten / wolten sie ihren Sachen
ein gnügen gethan haben. Sousten die Posten / die Ihre G.
Gn. der Herr Administrator in aussicht genommen / als den
Gebhart/ Heideck/ vnd nebenligende Dörter vnd Streichweh-
ren/ haben sie warlich fleißig besuchet / vnd nebenst der Bürger-
schaft vnd Soldaten so wol des Nachts als des Tages selbst vff
dem Wall gelegen / alle Winkel durchkrochen vnd zu versi-
chern/ die Brustwehren zu stärken/ das Geschütze an gebürliche
Orthe/ nach des Feindes vornehmen zu stellen/ mit den Consta-
beln vnd Bürgern solche Correspondentz gepflogen/ als wenn
es Ihr Fürstl. Gn. Brüder weren/ alle Nothdurfft was zu dem
Geschütze gehöret in gute verwarung vnd bey der Hand verord-
net/ daß Ihr Fürstl. Gn. trewes Gemütthe wol zu erspüren ge-
wesen / da hingegen anders theil / der Feind gering geacht/
schwach

schwach gemachte/ vñ nur Sicherheitē verursacht worden. Nach
deme aber die Keiserischen mit gewalt in die Stadt gedrungen/
seind sie doch durch männliche Gegenwehr der Soldaten/welche
Hauptman Schmid in der Eil zusammen gebracht / wieder-
umb durch drey Gassen/biß gegen den Zwinger/getrieben wor-
den. Dieweil aber selbiger Hauptman einen gefehrlichen vñd
fast tödlichen Schuß bekommen / haben die Soldaten wieder-
umb weichen / vñd den Keiserischen also die Stadt am selbigen
Orte vbergehen lassen müssen / vñd ist im ganken währenden
Scharmüsel / nicht ein Bürger daselbst gesehen worden / der
den Soldaten hette beypringen / vñd sich den Keiserischen op-
poniren wollen/was die Ursachen mögen gewesen seyn / das
sie endlich schwirig worden / kan man so eigentlich nicht wissen.
Etliche meynen / das die begangenen fauten, mit neuen Hal-
densleben/welcher vbel verwahrte Ort / vñd do man mit Ges-
schuß/Kraut vñd Loth ganz nicht versehen gewesen / vñd nicht
hat können erhalten werden / gegen einen solchen mächtigen
Feind/der sich mit etlichen Regimentern / halben Carthaunen
vñd andern Geschüße präsentiret: Item / das man in den
vnterschiedlichen Schanzen vñd Aussenwerken/die kaum vor
eine Musqueten gebawet gewesen / so viel redliche Soldaten
vñd Officirer hat erwürgen lassen / vñd das noch mehr ist / das
man die Zoll Schanze so liederlich verlassen / welches der Feind
selbst vor das beste Real Werk gehalten / vñd sich besorget/
noch etliche Wochen damit zu thun zu haben / auch etliche tau-
sendt Mann darfür zu verlieren / die Bürgerschaft mag zimlich
flüzig gemacht haben. Denn so lange als man dieselbe Schan-
ze gehalten/hat der Feind auch sein Volck / auff selbiger Seiten
der Elben halten / vñd sich vor der Ankunfft des Königs in
Schweden besorgen müssen / welche Furcht dem Feinde also
bald benommen / vñd ihme Anlaß gegeben worden / die Elb-

Brücken/ (auff welcher der Gelegenheit nach / man sich auch noch vnterschiedliche mal retiriren / abschneiden / vnd vor sich abwerffen können) zum Theil abzubrennen / vnd seine vollige Macht / auff die ander Seiten zu bringen / wolwissend / wenn gleich der Königliche Schwedische Succurs käme / so leicht nicht vber die Elbe lauffen werde. Zu deme ist auch kommen/ daß man nach demselben die Sudenburg vnd Newstadt abgebrantet/ vielleicht denen in der alten Stadt/ die diesen beyden Städten vmb der blossen Nahrung willen / niemals recht günstig gewesen/ zu mehrerm gefallen/ vnd den Verlust/ der guten Soldaten in etwas zu verbessern.

Aber obwol das Abbrennen der Vorstädte an Bestungen dahin gemeynet/ daß sich ein Feind darinnen nicht logiren solle/ So seind aber in diesen beyden Städten von den grossen steinern Häusern/ Kirchen vnd andern Gebäuden an Wenden/ Mawren vnd andern so viel stehen blieben/ daß sich die Soldatesca des Feindes also fort dabey erhalte/ sich darhinder verschansen vnd Batterien bauen können. Kan also das Seuffzen der Abgebranten Bürger beyder Städte / die obgemelten begangenen Fauten, vnd daß man vom Anfange her / den Schwedischen Succurs, vff gewisse Tage ja Stunden so gewiß gemacht/ vnd besser gewesen were / man hette die Verhinderung fein rund ausgesprochen / zu deme dann das Tillische Abmanungs Schreiben auch kommen / bey der Bürgerschaft endlich zur Schwirigkeit vnd Widerwillen viel gewircket haben. Es haben auch ihrer etliche buchstabiret / vnd die Köpffe zimlich zusammen gestossen/ ob solte bey der Commission die Hermanus Cummius vff sich nehmen müssen/ der Königl. Majest. zu Schweden zc. ein anderer vnd vngleicher Bericht vorbracht worden seyn/ als sonst der Stadt Zustand gewesen vnd erfordert. Es hat auch nicht wenig zur Fahrlessigkeit geholffen/ daß

daß denen guten redlichen Bürgern/ die das Ihrige aus Treue
herzigkeit willig hergegeben vnd vorgeschossen haben / andere
Partitemacher/ die durch Geschenke vnd aus Gunst der Jes
nigen/ die mit dem Wexel zu thun gehabt/ seind vorgezogen/ vnd
bezahlet worden/ davon der König zu Schweden wenig gewußt/
auch wol der selige Herr Falckenberg nicht / sondern die so aus
eigenmuth sich der Handel gebrauchet / vnd von diesem Kriege
balde reich werden wolten / vnd aus solchen Handeln kan keine
gute affection bestendig bleiben. Es wird aber dieses Unpar
teyisch vnd nur darumb erinnert / daß oftmahls nechst Gott/
durch die Weisheit eines einigen Mannes / viel kan erhalten/
auch durch zu viele Imagination / zuvor aus in solchen schwe
ren Fällen/ kan versehen werden. Sed de his satis.

Als nun der Herzog von Hollstein/ das Hornwerck am
Kroekenthor mit den Pappenheimischen angefallen/ hat er doch
starcken Widerstand funden/ denn sich die Soldaten von des
Herzn Administratoris Leib Compagni am selbigen Orte
tapffer gewehret. Diweil aber die Feinde/ so das neue Werck
erstiegen/ den Wall biß zu ermeltem Thore eingenommen/ vñ von
demselben in den Rücken des Herzn Administratoris Solda
ten gefallen/ seind sie obermannet / vnd meistentheil nieder ge
macht worden.

Der Grafe von Mansfeldt aber/ hat eine geraume Zeit
mit seinem Sturm an dem Heideck verzogen/ biß des Pappens
heimers vñnd andere Regimenten allbereit ober die Helfste der
Stadt hincin gewesen. Er hat aber auch so starcken Wiedere
stand befunden/ daß ihme zwey Stürm abgeschlagen worden/
vnd er selbiges Orts die Bestung nicht ersteigen können / son
dern ist zu dem Ulrichsthor/ das von der Stadt eigenem Volck
eröffnet worden / weil sie alles verlohren gesehen / einkommen/
vnd helfen plündern.

Zwischen dem Wasser aber vnd auff dem Marsch / ist es den Keyserlichen nicht besser ergangē / ob sie gleich eben langsam zum Sturm gethan / also / wie sie gesehen / daß die Stadt schon gewonnen gewesen / haben sie erst angesetzet / vnd nicht wenigern Widerstand als die Mansfeldischen befunden / biß sie zu letzt gütwillig seind eingelassen worden. Vnd wenn nur das neue Werck an der Newstadt mit der Wacht recht were versehen gewesen / so hett es noch manchen Man kosten sollen / were auch durch Gottes Hülffe die Stadt noch wol erhalten worden / oder zu einem leidlichen Accord kommen / denn an den andern dreyen Orten ware es fast unmöglich / dieselbe mit dem Sturm zu gewinnen / weil keine Breche vorhanden gewesen. Es hat aber sonder zweifel dem Allerhöchste also gefallen / damit manch frommes redliches Herze / aus dem unerträzlichen Joch vnd Dinstbarkeit erlöset würde / Er kan einem jeden doppelt wieder geben / was Er umb seines Nahmens Ehre willen / verlohren / hie zeitlich vnd dort ewig.

Nach deme nun der Feind / von der Newstadt in die alte Stadt Magdeburg kommen / ist ganz Vnchristlich vnd Vnmenschlich gehauset worden / in deme sie Jederman / wes Standes Jung oder Alt er gewesen / nieder geschossen vnd durchstochen / vnd keines Menschen verschonet / also daß sich die Einwohner verstecket / vnd in die Löcher gekrochen. Vnd ob gleich die Reuter in der Stadt in etwas vff ihre Pferde gekommen / vnd in den Gassen mit dem Feinde scharmütziren wollen / haben sie befunden / daß die Ketten an den Gassen seind vorgezogen gewesen / daß sie nit haben können fortkommen: Ob es nun durch Verrätherey oder ohne Gefehr geschehen / kan man nicht wissen. Der Feind aber hat also balde mit Hacken vnd Schüppen einen Weg ober den Wall an dem neuen Werck graben lassen / daß ein Reuter nach dem andern hat können hinein kommen / daß

Das auch alsobald etliche Reuterer mit in die Stadt eingefeset.
Die Stadt aber ist also fort wol an 50. oder 60. Orthen von
dem Feinde vnd insonderheit von den Pappenheimischen die
dazu befehlichet gewesen/mit Feuer anzustecken/vnd alles jäm-
merlich in die Asche geleet worden/darinnen etliche tausend
Menschen ersticket vnd verbronnen/vnd wo nicht were gerettet
worden/were gewiß die DomKirchen zu sampt den neben Ge-
beuden auch mit drauff gangen. Stehen also nun noch am
Fischer Ufer vnd omb den neuen Markt in die 120. Gebew/
sonst liget die ganze Stadt/mit allen ihren Gebeuden/statlichen
schönen Häusern/Rath vnd Zeughause/mit sampt den wol er-
bauten gezierten Kirchen ganz vnd gar zerstöret vnd verbrännet/
auch die Thore das man nur zum Sudenturger Thor aus vnd
eingehen kan/an welchen man nichts/als Jammer/Herkleid
vnd Elend sihet. Es wolle aber hiebey ein jedes Christen
Mensch bedencken/das die vngewöhnlichen omina so leicht
nicht in den Wind zuschlagen seyn / sondern sich nur vor ge-
wiß einbilden/das nur Enderung vnd Gottes Straffe darauff
folgen werde. Es ist kündig/wie im Anfange dieses Teutschen
Krieges der Wind/ den steinern Gangl / der zu Magdeburg
vom Bischoffs Hofe / in den Dom darauff zu gehen / vor vn-
dencklichen Jahren gebawet ware / abwarff / vnd wie der er-
schröckliche grosse Wind der in jetziger wärender Belagerung
stürmete / denselben Gangl vollends ganz bis an Boden dar-
nieder warff/auch fast keine Kirche in der Stadt war / da nicht
die Thürme heruntergeworffen/oder zum wenigsten die Dächer
sehr beschediget worden/aufgenommen der Dom/ober welchem
schrecklichen ansehen / fast allen Menschen in der Stadt sehr
bange war/vnd mancherley judicia gefielen/so wol von den Ca-
tholischen als Evangelischen / ein jeder wolte es nach seinem
Bedüncken auflegen. Es versamleten sich auch ein Zeitlang
vmb

umb den Newmarckt/ in der Nacht so viel Hunde/ die gar ein
grewliches Heulen verführten/ auch wol die Menschen hefftig
anstielen/ daß bald niemand daselbst herum/ dafür schlaffen
kont/welches auch eine schlechte Anzeigung war: Nu Gott der
Allerhöchste hat nach seinem Willen an Magdeburg ein War-
nungsexempel statuiret, darinnen sich alle Welt spiegeln kan.
Man sehe sich in den Historien wol umb/ ob nicht alle mal auff
solche vngewöhnliche Omina grosse Veränderungen erfolgt
seyn. Magdeburg war reiff zur Straffe/ es mußte ein helleuch-
tende Sackel werden/ dabey andere ihre Sünden besser se-
hen soleen/dem Allerhöchsten mit busfertigem Herzen/ in seine
Zornruhe zu fallen. Als nun der Brand/ wie vorgemelt/ so
schnell vberhand genommen/ seind dem Feinde viel statliche
Beuten im Feuer entgangen/denn gewislich an Proviant noch
in Jahr vnd Tag nichts würde gemangelt haben/ die Specksei-
ten/Schüncken vnd Würste sind in dem mächtigen Feuer her-
umbgeflogen/wie die schwermende Racketen/ vnd seind bey et-
lichen Bürgern z. bis in 300. Speckseiten vorhanden gewesen.
Item an allerhand Getreide/ an Wein vnd Bier/an köstlichen
Spanischen Weinen eine vngleubliche Notdurfft/von welchen
Früchten/Victualien vnd Geträncken/ der Feind sein ganzes
Lager eine geraume Zeit speisen können: Vnd haben sich die
Soldaten in dem starcken Getränke dermassen vbersoffen/daß
etliche nicht aus den Kellern noch vff den Gassen gehen können/
die das Feuer erariffen/ vnd mit verzehret hat. Aus den todten
Mannes vnd Weibes Personen haben sie Bäncke in den Kel-
lern gemacht vnd sich mit grosser Pomp vnd Herrligkeit vff
den Rebellen toll vnd voll gesoffen/ endlich die Böden aufge-
schlagen/daß Wein vnd Bier in Keller geloffen/da die Todten
etliche Tage hernach darinnen ligen vnd schwimmen müssen/
aber Gottes Straffe wird schwerlich außbleiben/daß mancher
solcher

solcher verruchter Mensch/ noch wird Hungers vñ dursts sterben müssen. In Summa/ man hat von keinem Mangel in der Stadt gewußt/ als etwan an Hey vnd Stroh/ vor das Vieh/ das in grosser Menge darinnen gewesen vnd verbrunnen.

Wie viel Menschen in der Stadt durchs Feuer vñ Schwerdt ombkommen/ kan man nicht eigentlich erfahren. Den 21. Masi altes Calenders seind schon 24000. Menschen gezehlet worden/ so man in die Elbe geworffen/ denn man hat niemand begraben: In den Kellern vnd Gewölben hat man zu 20. 30. 40. bis in 80 Personen gefunden/ die ersticket gewesen. Es hat sich auch eine Jungfraw vom Adel/ weil sie der Nothzuchtigung der Soldaten nicht anders zu entgehen gewußt/ in einen Brunnen gestürzet/ vñ erseuffet/ vñ seind viel vnter den Feinden gewesen/ die keinem Menschen Quartir gegeben/ sondern alles ohne Unterscheid/ Frauen vñ Kinder darnieder gemacht/ wie dann auch in der Catharinen Kirchen auff der Bricken oder Borkirchen in die 53. Menschen gefunden worden/ welchen allen vnarmhertziger weise die Köpffe ab/ vñ entzwey gehawen gewesen.

Zwene Soldaten/ die ein vnmündiges Kind auff der Gassen ligende/ schreyend befunden/ haben es ein Jeder bey einem Beinlein genommen/ vñ in der Mitten von einander gerissen. Mit den gefangenen auch schon todten Weibs Personen/ ist zumal vbel hauff gehalten vñ vmbgangen worden/ daß davon nicht gnungsam zu schreiben ist/ haben es gleich die höchsten Officirer gesehen/ so haben sie es nicht gestrafft/ sondern gelobet/ vñ gesagt: das sind die rechten Soldaten/ die bringen die Leute vmb/ vñ richten auch andere wieder zu. Wunder ist/ daß nicht Gott mit Schwefel vñ Pech darein geschlagen/ vñ dieses Barbarische Werck nicht gestraffet hat/ wird vielleicht der Lohn noch hernach folgen/ sein Wort kan nicht liegen.

E

Einer

Einer vnter des Pappenheimers Regiment / hat sich be-
rühmet daß er mehr als 20. Kinder durch stochen hette / da man
ihn aber gefraget / was ihm doch das vnschuldige Blut gethan /
da antwortet er / es weren Rebellen Kinder / vnd wenn er deren
noch hundert erwürget hette / so solte es ihm desto lieber seyn. A-
ber diß vnschuldige Blut hat den Anführer des Mordens vnd
Brennens / schon vor Gottes Angesichte citiret / innerhalb
Zarhs frist Rechenschafft darfür zu geben. Er hat sich verneh-
men lassen / er wolte die Ehre / daß er die Stadt eroberet vnd den
Herrn Administratorem gefangen bekommen / nicht vmb eine
Million Goldes geben / worumb er auch also fort eine eilende
Post an die Keyserliche Mafest. abgefertiget / deroselben alier
vnterthänigst zu erkennen gegeben / daß sieder der Zerstörung
der Stadt Jerusalem auch Troja keine solche Victoria sey gese-
hen worden / woraus man seine innerliche Freude vber ein solches
Elend / vnd blutbegieriges Gemüth verspüret / wie dan auch sein
Regiment vor allen / an Blut vnd Schandthaten den Preis vnd
Vorzug erhalten. Seiner Pagen einer hat sich so wol auff
Mausen verstanden / daß er ein ganz Felleis voll / an güldenem
Ketten / Armbändern vnd Silbergeschirr / öffentlich sehen las-
sen / welches er bey den Pristern sein hat finden können. Daß
aber auch eine so grosse Ehre bey der Verrätheren / vnd da Nie-
mandes in Gegenwehre stehet / auch 1000. Mann gegen 40.
oder 50. zurechnen / fechten / bestehen sol / das wird einem jeden
zu bedencken anheimb gestellt. Man pflegt wol im alten
Sprichwort zusage: Verschon ist auch gespielet: Vnd kan einer
sein bestes verschaffen / welches an ihm selbst ist. Item:
daß in solchen Fällen / vnd wenn es so weit kommen / kein Ge-
neral / wie strenger auch ist / seiner Soldatesca mächtig seyn kan /
zuvoraus / wenn man ihnen die Plünderung versprochen hat.
Aber weit ihnen im Sturm so wenig Widerstand geschehen /
vnd

170
vnd sie so leicht in die Stadt kommen waren / wol wissend / daß
sie keine Türcken noch Heyden sondern Christen darinnen fin-
den würden / so were es in etwas Christlich gewesen / wenn man
der armen unschuldigen Kinder vnd Weibsbilder mit dem
würgen vnd schänden ein wenig verschonet hette. Man wil aber
glaubwürdig berichten / daß es von denen Herrn Generalen
befohlen worden / daß man das Kernerest so tractiren sollte / denn
sonsten mag so noch manch redlich Soldat gewesen seyn / der
sich geschämt haben würde / sein ritterliche Hand vnd Gewehr
wider ein Weibsbild vnd unschuldiges Kind zu zucken / ge-
schweige denn zu brauchen. Ist auch vor alters keinem keine
Ehre gewesen / wenn er nur ein Weibsbild beleidiget hat / das
sich nicht gewehret / aber bey soleher alten vergessenen Kriegs-
disciplin, bey der alten teutschen tapffern Redligkeit / die nicht
mehr gelten wil / hat Gott Augenscheinlich vnd in puncto mit
dem Feuer gestraffet / daß der Muthwille hat müssen verfürhet
werden / wird es auch ferner nicht vngestraft lassen.

Vnd weil man sich besorget / es möchte die Röm. Keiserl.
Maj. allerdings nicht zu frieden seyn / vnd wie man sagen wil /
sol es dem Herrn General Tilli selbst nicht gefallen haben / daß
man eine so vhralte weitberümbte Stadt / vnd an welchem
Paz der Röm. Keis. Maj. zc. Ja dem ganzen Reiche viel geles-
gen / so ganz in die Asche geleeget / vnd daß das leere Nest eine ge-
raume Zeit / nicht viel nütze seyn würde: Als ist die Bürger-
schafft beschuldiget worden / ob solte sie in allen ihren Häusern
Pulver gehalten / vnd die Stadt selbst angezündet haben / wel-
ches / wenn es wahr / vnd sie solches Willens gewesen / vielleicht
che vnd nach dem Exempel der Numantiner wie es Plutarchus
beschreibet / gethan hetten / damit sie ihre Weiber vnd Töchter /
vor der Gottesvergessenen Schandung errettet / vnd sie ein ewi-
ges Lob davon bracht hetten / so haben sie sich / (auch die Verrä-

cher selbst/ daß man endlich Christlich handeln würde / getre-
uet. Aber seine Soldaten haben es gnungsam bekand / wel-
cher massen sie mit dem Feuerinlegen seind beschlichte gewesen.
Vnter dessen seind ihnen denn die Beuthen entgangen vnd ver-
brunnen. Es weist es auch der Brand an ihme selbst aus/
daß allwege zwischen drey oder vier Häusern sonderlich am
breiten Wege / eines angesteket worden / damit das Feuer zu-
sammen schlagen können / darzu ist Gottes Straff kommen/
daß der Wind / bald von allen vier Orten der Welt sich erho-
ben / vnd das Feuer mit Gewalt hin vnd wieder getrieben / also
daß den Mordbrennern vnd Reubern die Zeit der acht Tage/
die ihnen sonst zu plündern versprochen gewesen / vmb ein groß-
ses zu kurz worden / weil die Stadt innerhalb wenig Stunden
in der Asche gelegen / vnd in deme sie also ihre vnersetzliche Be-
gierde mit Geldt vnd Blut nicht gnungsam erfüllen können/
ist ihr Vorsatz / wo es Gott nicht ändert / sich an Braunschweig/
da es auch sehr gute Alemannisten gibt / vnd leicht also wie zu
Magdeburg zugehen kan / Item an Hildesheimb vnd andern
Orten zuerholen / oder das lange zu gesparte Confect zu ver-
zehren / welches aber bey dem Allerhöchsten stehet / das viel-
leicht etlichen das Trum zu kurz werden / vnd den Tod daran
fressen möchten.

Vnd daß dieser lobwürdigen Thaten zum Exempel vnd
Gedächtnis / wie Christen gegen Christen gehandelt / vnd weil
eine so vhralte berühmte Stadt in Grund solte geschleiffet/
auch Ihr Nahme getilget vnd geändert werden / noch mehr nicht
vnan gemeldet bleiben: So berühmte sich auch einer / daß er
ein Mägdlein von vngesehr 13. oder 14. Jahren (defluente
sanguine in calceos) violirer, auch hette er drey außgezogene
Bürger / die allbereit Quartir gehabt / mit einem Schlacht-
schwert darnieder gehawen / vnd nebenst andern / der Stadt
Wa

Wapen / darinnen die Jungfraw mit dem Kranke geschnitten
gewesen / vnd ober dem einen Thor gestanden / herunter gerissen /
vnd in Stücken geschlagen / treffliche ritterliche Thaten!

Ein anderer berühmte sich / wie er zwey Schwestern / schö-
ne Menschen in einem Hause gefunden / die sich nackend auß-
ziehen müssen / sein vollbringen mag ich nicht melden / Nach-
mals hette er sie mit ins Lager genommen / etliche Tage bey sich
behalten / aber weil er marchiren müssen / den Erabaten geschen-
cket / solt solche Blutschande ungestraffet bleiben / das siehet bey
dem lieben Gott. Vnd solches ist nicht alleine von gemei-
nen Soldaten / vnd leichtfertigem Gesinde / verübet worden /
sondern auch von Hauptleuten / vnd andern Officirern / we-
ren auch etliche wol mit Nahmen zu nennen / wenn man nicht
der Weibsbilder die mit Gewalt vnd Zwang darzu genötiget
auch wol gebunden worden / mehr / als solcher vnzüchtigen Hun-
de verschonete. Einem von den höchsten Officirern wird es
dermal einsten sein Herz wol sagen / wie er mit guter Leute Kin-
dern vmbgangen. Viel haben sie nach vollbrachter Schande
hernach erwürget / verschencket / verkaufft / gleich wie die Hun-
de / ihnen Pulver an heimlichste Orter gesteckt / vnd verbrennet /
Also muß man mit den Kezern vmbgehen. Schwangere Wei-
ber / bey denen die Frucht halb geböhren gewesen / hat man zu
erwürgen / auch wol lebendig ins Wasser zu werffen nicht ver-
schonet.

Ein garstiger schwarzer einäugiger Dieb / hat eines ehr-
lichen Mannes Tochter angefasst / schleppet dieselbe mit Ge-
walt neben sich her / nach dem Brückenthor / vnd weil das gute
Mensch von dem vielen Weinen vnd Thränen sich gerne abge-
wischet hette / hat sie ihn gebeten / er wolte ihr doch die Hände
loß lassen / damit sie sich abwischen könnte / welches er ihr / wiewol
nicht gerne vergönnet / So bald sie loß worden / stärket sie sich im

Sprung in die Elbe/daz gleichwol aus diesem vnd andern G-
gempelein mehr zu sehen/wie noch viel redliche keusche Herzen in
der Stadt gewesen/die sich lieber den Tode selbst angethan/als
sich schenden lassen/wenn sie nur den Ehren Dieben heissen ent-
zinnen können. Es wird manchen von diesen Gefellen wol
verdriessen/daz man sie so tituliret, alleine weil es kein ehr-
liebender Soldat thut/ so seind sie es auch nicht viel bessers
würdig.

Sonsten wenn ein Soldat ein Weibsbild geführet/vnd
ihme ein Crabat begegnet/ihme dieselbe nicht gnuwillig geben
wollen/so hat er ihr stracks den Kopff ab vnd entzwen gehawen/
wie denn dieselben meissentheils nach den schönsten Menschen
gegraset. Ein Bürger der vff den Knien liegende Gnade vnd
Quartir begehret/wird auff der Gassen durchschossen/davon
er darnieder gefallen. Weil er aber nicht also fort tod bleibet/
sondern sich noch oberwirfft/kömpt ein ander vnd schläget ihm
mit einer Parthen viel Wunden in den Kopff/da er aber noch
nicht verreckt/kömpt der dritte/vnnd schläget ihn mit einer
Holzart den Kopff zu stücken. Der vierdte kömpt/vnd mache
ihme die Hosen auff/schneidt ihme das Membrum virile ab/
vnd stecket es zu sich: Vnd solcher gemuster Soldaten hat man
etliche vnter den todten gefunden/die man in der Nacht in der
Buckawer Schanzen erwürgt hat/welches gemeinlich die
Italiäner practiciren: Was sie vor Zauberwerk damit ver-
richten/ist wol zu vermuthen. Endlich ist dieser arme Mensch
wie oben gedacht/vom Feuer verzehret worden/der also fünff
Straffen in seinem Tode erlitten.

Hierüber weren noch viel dergleichen gottlose verruchte
Schand- vñ Mordthaten zu erzehlen/die die besten Christen/an
ihren NebenChristen verübet haben/muß aber vmb züchtiger
Herzen willen verbleiben. Vnd mit diesen vberbarbarischen
Tha-

Thaten/als rauben/morden/feh ändern vnd brennen/vermeynen
man die ganze Welt zu erschrecken vnd zu pochen/ auch Gott
im Himmel zu trohen/sein Wort umbzustoßen/ vnd den Papst
an seine Stadt in das Regiment zu setzen/wie man dann die Zei-
tungen stracks per posta nach Rom/vnd alle Catholische Orte
spediret, da man mit processionibus vnd neuen Freuden-
spielt gegaucklet als wenn durch das arme Magdeburg/ alle Eua-
ngelische Städte vnd Stände zu Grund vnd Boden gestür-
zet weren. Es solte sich einer verwundern/ als die procession
in Magdeburg gehalten worden/wo doch in eil/ ein solcher wust
Pfaffengeschmeiß muß herkommen seyn/ doch helt man dar-
für/ daß sie der Monsieur Larne aus Italia vnd Spania vff
Ziegen zu kommen citiret, gleich wie die Haxen/ wenn sie auff
den Prockelsberg fahren.

Es werden aber diese wenige Exempel darumb allhier an-
geführt/ daß sich andere Städte vnd Stände daran spiegeln
können/ wie man ebener massen also mit ihnen umbzugehen in
starckem Vorsatz ist/ der jenigen Beuten/ so ihnen durch Got-
tes Verhengnis im Feuer zu Magdeburg entgangen/ sich an-
derswo doppelt zu erholen. Worauff sich die örter/ denen man
gedräuet/ wol zu bedenden haben/ denn wo man anders nur
Meister spielen kan vnd mag/ wird man nichts vnterlassen/
diese Ehr-Gelt- vnd Blutbegirigen Gemüter seind nicht zu er-
füllen.

Die gefangenen Bürger belangende/ seind zum Theil
sehr vbel gehalten/ etliche auch erst auff dem Felde/ do sie doch all-
bereit Quartir gehabt/ erwürgt worden. Etliche/ vnangesehen
man ihnen alles genommen vnd verbrennet hat/ haben sich mit
einer mercklichen Summa Geldes/ so sie in der Nachbarschafft
vnter Freunden auffgebracht ranzioniren müssen/ welches de-
ser noch viel thun sollen. Der Türcke wenn er einen Christen
gefans

gefangen bekömpft / der sich ranzioniren sol / der wird auff
Bürgschafft auff freyen Fuß gestellt / oder auch wol auff seine
Verpflichtung / vnd mit Patenten ins Christenthum zu ziehen /
versehen vnd abgefertiget / damit er seine ranzion samlen möge.
Aber hie vnter Christen haben viel redliche Leute / denen all das
Ihrige genommen vnd verbrandt ist / die auff der Welt nichts
mehr / als das liebe Leben / keine Freunde / auch keine Mittel Geldt
auffzubringen wissen / mit dem Kriegswesen nichts zuschaffen
gehabt / dennoch an Ketten vnd Banden ligen vnd fast verder-
ben müssen / vnd in solchen Banden Geld schaffen sollen. In
Summa diß sind Leute die unmögliche Dinge möglich ma-
chen können / vnd ob schon die Reker von ihnen bis in die Höll
verdampft seyn / so ist doch ihr Belt ihrer Seelen Speiß. Die
alten Kriagsgebräuche / die die löblichen Keiser Maximilianus
vnd Carolus V. zu ewiger Gedächtnis in Schrifften verfassen
lassen / vnd von der Teutschen Nation seind in Ehren gehalten
vnd practiciret worden / das nemlich: Ein jeder Officirer vnd
gemeiner Soldat / der von seinem Feinde gefangen wird / mit
einem Monat Soldt / solt ranzioniret werden. Aber jeso
seind viel andere Kriagsrechte auffkommen / Ein Hauptman
der 100. Thaler zum Monatsolde hat / sol 1000. Thaler geben /
Ein Obrister der Monatlich 1000. Thaler hat / sol 10000. ge-
ben. Vnd ob gleich manch gemeiner Soldat auch wol ein
Officirer in Jahr vnd Tag / nicht einen Monat Sold in seine
Hände bekömpft / so sol es doch möglich seyn / aber also muß man
die Lutteraner scheeren / warumb lernen sie nicht auch / mit ar-
mer Leute Schweiß vnd Blut Krieg führen / das sie auch Gelde
bekommen / welches wol geschehen kan / wenn Gott einmal v-
ber die Babylonische Thur verhängen wird / vielleicht muß sie /
wie in der Offenbarung Johannis siehet / doppelt gestraffe
werden / vnd heraus geben / was sie geraubet hat. Denn al-
lent-

lenthalben wo man fast in Deutschland hinkömpt/ findet man
das Antichristliche/ Jesuitische/ Ligistische Wapen/ nemblich
Brandsteten/ vnd an ihren Thaten ein Exempel vnd Wegwei-
ser zu allen Lastern/ auch wie man Land vnd Leute schäken/
in Contribution setzen/ vnd vnschuldiger Weise verderben sol/
aufwertige Betuler reich/ vnd dagegen die Stände des Reichs
zu Bettlern zu machen. Es ist ein Spott/ daß man den Jesuitis-
schen Beichtueffeln so viel Raum gegeben/ da doch handgreiff-
lich/ daß wer sich nicht wil das seligmachende Wort Gottes
aus seinem Herzen reißen/ Ihme all das seinige nehmen/ vnd
sich gutwillig vor den Kopff schlagen lassen/ der muß ein Re-
belle seyn.

Hier ist zu berichten/ als die Regimenten von Magdeburg
wieder ab marchirten/ in grosser Hoffnung/ zu Braunschweig
auch balde also einzuheizen/ kommen zweene Officirer ins Ge-
spräch/ ein Evangelischer vnd Römisch Catholischer. Der
Evangelische fragt den andern/ mein Camerada wie kömpt es
doch/ daß ihr in der Evangelischen Lande/ die Städte vnd Dörf-
fer so gerne abbrennet/ auch offimals die/ so euch nicht beledi-
gen/ denn wo ich in Teutschland gereiset bin/ vnd solche verbren-
te Orter funden/ vnd gefragt/ wie es zugegangen/ ist allenthal-
ben Antwort gefallen: Die Keiserischen haben es gethan/ die
Keiserischen haben es gethan/ &c. Nun habe ich vermeynet/
ihr werdet der Evangelischen Länder vnd Städte erblich besit-
zen/ düncket mich derwegen nicht wol gethan seyn/ daß ihr sie
so in Grund abbrennet. O mein lieber Camerada antwort-
er/ Ich muß die lauter Wahrheit bekennen/ wir wissen wol/ daß
wir die Lande nicht erhalten werden/ denn wir machen es nicht
darnach: Vnd weil wir die Städte wie das Gold vnd Silber
nicht mit vns führen können/ so gönnen wir sie euch Lutteri-
schen auch nicht/ zu deme wissen wir gar wol/ daß der Evangeli-
schen

sehen Glaube nicht falsch ist / vnd ihrer so viel nicht in die Hölle
kommen werden / Darumb wolten wir sie gerne / wie Ketzer ges
bühet / hie zeitlich verbrennen / 2c.

Sonsten seind nebenst dem Galkenberg von Officirern
geblieben / der Obriste Leutenant Lonnes / Obrister Leutenant
Drost / Major Kresse / Major Bodrich / Hauptman Bhrsted /
ohne was von Hauptleuten vnd Befehlhabern vor der Zerstö
rung seind umbkommen / Auch ein Rittmeister Heidemang ge
nant / Hauptman Schmid / vnd Hauptman Lazarus / Item
Angerman seind sehr verwundet / vnd sonsten mehr Officirer
gefangen worden / die sich ranzioniren sollen. So ist der Ge
neral Major Ambstelrath in einen Schenckel geschossen / vbel
verwahret worden / vnd daran gestorben. Der Obriste Of
ficer / Obrist Leutenant Boi / vnd Major Schaffman / Item /
zwene Rittmeister die Spiegel genant / vnd andere Officirer
mehr / vnter der Cavalleri seind gefangen worden.

Ihr Fürstl. Gn. der Herr Administrator aber / nach
deme Er den Dienstag morgens vff den Heideck gangen / die
Wachten zu besichtigen / seind an beiden Schenckeln von einer
halben Carthausen Kugel berühret / vnd etwas verletzt wor
den / woraus / wie vormals berichtet / nochmals zusehē / das Ihre
Fürstliche Gnaden sich nicht geschewet ihre angenommene
Posten fleißig vnd mit Ernst zu besuchen. Vnd nach deme
Ihr Fürstl. Gn. sich mit andern Stiefeln versehen / vnd wieder
aufreiten wollen / kömpt gleich das Geschrey / der Feind sey
schon in der Stadt / da sie dann den nechsten / wo die Gefahr ge
wesen / hinreiten wollen / aber also balde gefangen genommen
worden / vnd ob schon der Tillsche General Adjutant, so in
Magdeburg gefangen gewesen / vnd Ihrer Fürstl. Gn. Quar
tir zugesaget / auff den Gassen geschrien / Tili / Tili / Tili / man
sol des Fürsten schonen / aber ungeacht dessen haben doch die
Sol
3

Soldaten hefftig Feuer auff Ihr Fürstlichen Gn. geben / vnd
dero einen Diener nach dem andern darnieder geschossen / da
dann Ihr Fürstliche Gn. auch einen Schuss in den Schenckel
bekommen / vnd man hat dero selbst auch mit einer Partisan
eine Wunden in den Kopff gehauen / mit aller Gewalt auff sie
eingeschlagen vnd gestossen / vnd mit vielen ehrenrürigen Wor-
ten vermassen tractiret / also das sie auch endlich in einer Ohn-
macht vom Pferde gesunken / da man Ihr Fürstl. Gn. den
Hut / Degen / Kragen / Handsberschläge / auch aus den Hosen
genommen / was sie bey sich gehabt / hetten dieselbe auch wol
ganz außgezogen / vnd auff vielfeltiges zuschreyen des Fürsten-
Standes nicht verschonet / wenn nicht ein Leutenant der etwas
bescheiden gewesen / sich Ihr Fürstl. Gn. mit Gewalt ange-
nommen vnd sie off zweyen Piquen vollends in des Pappen-
heimers Gezelt tragen lassen / da sie denn vom Pappenheimer /
Herzog von Sassen Lauenburg / vnd dem Herzogen von
Hollstein / sehr scharff mit Worten seind angegriffen worden /
denen allen aber Ihr Fürstl. Gn. mit sonderbarer Herrschaff-
tigkeit geantwortet / vnd sich des guten Gewissens / das sie in
dieser Sachen gegen G D T vnd den Menschen hetten / ge-
tröstet.

Weil nun der gute Herr Administrator im Lager vor
Magdeburg vnd in des Pappenheimers Gezelt lage / da kamen
hohe vnd niedere Officirer / (außgenommen der Herz General
Zillische / denn Ihr Fürstl. Gn. solten des Pappenheimers
Gefangener seyn) Ihr Fürstl. Gn. zu zusprechen vnd zu sehen /
Item auch Geistliche Patres vnd dergleichen / denen Ihr Fürstl.
Gn. fast allen Red vnd Antwort geben muste / vnd gefielen al-
terhand seltsame Discurs. zogen auch etliche mit einer langen
Nasen ab / aber des Pappenheimers gemeine Soldaten vnd
Musquetirer kamen mit grosser importunitet ins Gezelt /
pralen

pralende/ Ich habe den Bischoff geschossen/ ich habe de Bischoff
geschossen/ 2c. Bald kame ein ander/ vnd wolte eine grosse Ver-
ehrung haben/ vorgebende/ Er heet Ihr Fürstl. Gn. gefangen ge-
nommen/ bald kamen derer wieder ein Paar mit fluchen/ pochen
vnd Ehrenrürigen Worten/ daß wenn sie keine Verehrung be-
kämen/ so wolten sie daß dieser vnd jener den Bischoff mit Leib
vnd Seel holete/ bedrauende / sie wolten ihme doch noch den
Nest geben. Also muste der gute fromme Fürst/ der sein Leib
vnd Leben vor seine Unterthanen vnd das seligmachende
Wort G D T es dargestellet vnd präsentirt. vff seinem La-
ger hören/ was diese gute Brüder im Schilde führten. Folgens
des Tages seind Ihr Fürstl. Gn. nach Wolmirsted geführet
worden/ vnd seind bey dero selben vffm Wagen gesessen der Feld-
prediger Magister Münchmayer / der Ober Zengmeister Chris-
stoff Treffelers/ vnd Hauptman Schmid/ so sehr verwundet ge-
wesen. Ihr Fürstl. Gn. seind Convoiret worden/ mit einer
Corporalschafft Soldaten zu Fuß/ vnterm Geleit eines Auf-
warters vom Pappenheim/ ein gar junger Mensch / vnd wie
Ihr Fürstl. Gn. nach Wolmirsted kamen/ wolte der Hauptman
daselbst Nahmens Caspar Fincke von Pralen/ nichts wissen/
noch Ihr Fürstl. Gn. so viel Kosters geben / daß sie als ein ver-
wundeter kranker Fürst weren accommodiret gewesen/ vnd
ware kaum so viel Stroh zurlangen/ daß Ihr Fürstl. Gn. dar-
auff konte geleget werden / dürffte auch sich Niemandes / von
Ihr Fürstl. Gn. daselbst vormals getrewen Unterthanen vn-
terstehen/ dero selben ein Bettlein vnter zu legen / da doch offte-
mals einem schlechten gefangenen Officirer mehr Courtes
widersehret / laber in Summa/ ein jeder meynete er were schon
der halbe Keiser.

Wenn man nun diese Tragædiam ein wenig wil betrach-
ten/ so seind nechst der Straffe G D T es die jenigen Magde-
burg

bürger vnd die meisten so vntrew gewesen / an ihres Vaterlands
des Zerföhrung vnd Vntergang nicht wenig schuldig / denn sie
bey diesem Werke / darzu sie doch im Anfang selbst geholffen/
aber endlich nichts darbey thun wollen / andere die gut vnd treu-
herzig gewesen geneidet / den Soldaten nicht ein bislein Brot
gegeben vnd gegönnnet / also daß sie zum Theil haben müssen
betteln gehen / vnd wenn sie denn von einem guthertigen ein
Stücklein Brot überkommen / seind sie wieder auff den Wall
gangen / vnd ihre Wacht gegen den Feind vff das getrewlichste
vorsehen / also daß bey den Soldaten im geringsten kein Man-
gel gewesen.

Mancher hat über dem Gelde gefessen wie ein Gansß über
den Eyern / dasselbe ehe dem Feinde gegönnnet / alls vmb des ge-
meinen Besten willen / durch Wexel in Sicherheit zu setzen vnd
zu haben / also daß es auch die Treuherzigen vnd die das ihrige
willig vorgeschlossen entgelten müssen. Vnd als man nach ab-
brennung der Newstadt vnd Sudenburg / mit dem Quartir in
die alte Stadt weichen müssen / haben die Soldaten / Tag vnd
Nacht vnter dem freyen Himmel gelegen / vnd ob wol viel Ge-
zelt in der Stadt gewesen / hat man den Officirern doch keines
leihen wollen: Endlich da die Noth an Mann gangen / hat
man ein Tag drey oder vier vor der Eroberung den Soldaten
etwas von Speck vnd Brot gereicht / doch von etlichen mit
großem Vnwillen vnd Fluchen.

Das neue Werk gegen der Newstadt / über welches der
Feind hinein kommen / hette man von der alten Bestung vnd
Wall / der noch sehr fest gewesen / abschneiden vnd abgraben
können / darzu haben sie sich nicht verstehen wollen. Vnd das
noch mehr ist / haben sie dem Herrn Administratori vnd Sal-
ckenbergen den Mangel des Pulvers verhalten / welches sie bey
Zeit erinnern vnd nicht auff die höchste Noth verschweigen
sollen

sollen. Denn man hat Ihr Fürstliche Gnaden ehe sie in die Stadt kommen/von einem weit grösserem Vorrathe berichtet/vnd weil man vmb dessen willen / mit den Stücken zu spielen fast auffhören müssen / vnd das Pulver / so die gutherrigen Bürger Pfundweise zusammen getragen/nicht flecken wollen/ solches haben die Verräther alles hinaus berichtet / darauff der Feind mit seinem approachiren sicher vnd ungehindert auch mit Gewalt fortfahren / vnd sein Geschütze vnter der Stadt Stücken pflanzen können / wiewol glaubwürdig berichtet worden / das der Feind an Pulver / ohne was im Feuer auffgangen / in heimlichen Gewölben vnd Thürmen einen zimlichen Vorrath sol gefunden vnd heraus geföhret haben.

Es wollen es wol etliche entschuldigen vnd sagen : Es sey Salpeter gewesen / aus welchem man aber / wenn man es gut gemeynet hette / wol bey Zeit können Pulver machen lassen : Können sich also die guten Magdeburger / nicht gänzlich entschuldigen / das sie nit in vielem aus den Schrancken der Treu vnd Standhaftigkeit geschritten seyn / sich nicht begreifffende / das / wie süsse die Jesuiten auch gepuffen / dennoch eine Seruitur vnd Gewissensangst würde nachfolgen / wenn sie die Possession erhalten / est communis Regula, Hæreticis non est seruanda fides, die ist durch so viel lange Jahr / mit viel tausent Exempeln practiciret worden / das möchte man wol in kein Vergeß stellen. Aber der Ehrgeiz vnd Eigennutz mache Schälcke / der Pappenheimer vnd Herzog von Sassen zc. selbst / haben in beyseyn vieler Cavalliri öffentlich / vnd das es alle Umstehende gehöret / zu dem Herrn Administratori gesagt / Wie Er doch bey den vntrewen Bürgern hette so viel zusehen / vnd sich wagen mögen / denn Ihr Fürstlich. Gnad. weren so verrathen vnd verkaufft gewesen / sie hetten alle Abend Schreiben aus der Stadt bekommen / vnd berichtet / was den Tag vor-

gan

gangen/ vnd was die fünffteige Nacht vorgehen würde. Den Montag Abend zuvor weren sie berichtet worden wie stark man die fünffteige Nacht auff die Wacht ziehe würde/ welche Werke am stärcksten würden besetzt seyn/ vñ welche Stunde sie würden wieder von der Wacht vnd zu ruhen gehen/ worauff sie beschloffen/ die Stadt vmb dieselbige Zeit mit Ernst vnd Gewalts anzufallen/ welches ihnen auch gelungen.

Vnd dieses haben die Verräther gar leicht können zu Werke richten/ weil man nichts hat vornehmen dürffen/ es hat dem Rathe vnd der Gemeinde zuvorhero müssen zu wissen gemacht werden/ darunter die Verräther Zeit vnd Raum gnungsam gehabt/ dem Feind alles hinaus zu berichten. Die Schwärger schafft hat sich zu weit erstreckt. Vnd ob gleich solche Verräther gemeynet/ daß es nur vber die getrewen vnter der Bürgerschaft/ vnd vber Ihr Fürsil. Gn. Leute ausgehen würde/ so haben sie doch eben das müssen außsehen/ was den getrewen widerfahren: Denn sie ja so wol zum Theil niedergemacht/ des ihrigen beraubet/ ihre Häuser verbrennet/ vnd ihre Weiber vnd Töchter geschendet worden/ ohne daß die/ welche gefangen gewesen/ sonder Ranzion seind loß kommen. Haben also diese vngetrewe Leute/ ihre getrewe Obrigkeit/ ihre auffrichtige Mitbürger/ die redlichen vnd getrewen Soldaten/ ihr Vaterland/ ihr eigen Fleisch vnd Blut/ als Weib vnd Kinder/ dem Feinde zu berauben/ vnd zuschenden in die Hände vnd auff die Fleischbank geliefert/ darüber **G D T** zu seiner Zeit wird Richter seyn.

Es ist aber auch bey dieser Tragcedi zu bedencken/ daß grosse Herren ihr Vornehmen auch in drey Stück theilen sollen/ nemlich in den Anfang/ in die Mittel/ vnd in das Ende. Vnd sollen sich nicht so bloß auff der Menschen Zusagen verlassen/ denn wenn sie falliren, vnd man hat die Vires vor sich selbst
nicht

nicht in Händen / sonderlich einen Krieg zu prosequiren / so
kan es keinen Bestand haben. Vnd diese obgemeldte Specialia/
die nicht umbgehen werden mögen / lasse sich niemand verbrie-
sen / denn wenn man die Warheit sol berichten / kan man keiner
Parthen schonen.

GOTT der Allmächtige behüte alle fromme
Christen vnd getreue Dertzen / vor einem solchen er-
schrecklichen vnd trawrigen Zornspiegel / vnd gebe
den verstorbenen vnd erwürgten Märtern / die ewige
Seligkeit / Amen.



Folget die erbärmliche Klage / vnd
letztes Testament der Magdebur-
gischen
Damen.

Im Thon:

ACH HERRE mich armen Sünder / etc.

ACH ich elende Dama / wie hab ichs so versehn /
Vmb mein Zucht Ehr vnd Schame / ist es nun
gantz geschehn /

Mein

Mein Buhl hat mir zerrissen / mein Ehrenkränzelein /
Viel Wunden mir geschmissen / das mag ein Liebe seyn.

2.

Meine Wächter waren entschlaffen / die Verräther aber nicht.
Drumb ich mit Sewr vnd Wassen / Treulos ward hingericht.
Mein Buhl alt vñ verschlagen / durch Brieff mich sicher macht.
Wer traut der wird betrogen / man nehm sich nur in acht.

3.

Meine Freunde vnd Verwandten / mein Nachbarn theten all /
Gleich wie sie mich nicht kanden / verlissen mich zu mal /
Dem ich mein Kranz verheissen / kunt mich erretten nicht /
Sein Zusag auch nicht leisten / wie er wol war verpflicht.

4.

Mein Gärtlein war gebawet / mit schönen Blümelein /
Jest siehts / daß einem grawet / Ist eitel Asch vnd Stein.
An stat der schönen Blumen / man Teuffels Bißjest schawt /
Disteln vnd Dornen grünen / Pappeln vnd Tillenkraut.

5.

Manch keusch Jungfraw von Ehren / ward jämmerlich ge-
schänd /
Mit Sewr vnd Schwerd verzehret / manch klein vnschuldig
Kind
Erwürgt man wie die Hunde / mit ritterlicher Wehr.
Das Blut floß etlich Stunden / als wenns faul Wasser wer.

6.

Es seind nicht außzusprechen / die Tyranneyen all /
Das Herz wil mir zerbrechen / wenn ich denck den Vnfall /
Kein Türck / Tyrann noch Heide / es äger machen künnt /
Der Teuffel in der Hölle erdenckt kaum solche Tünd.

E

7. 3ß



7.
Ist das der gute Christe / der Gottfürchtige Held /
Ja wers nicht anders wüßte / er würd vnter die Heiligen gezelet /
Das Sprichwort braucht er eben / man sol kein Ketzler nicht /
Glauben halten noch geben / nur alles zu Bodem gericht.

8.
Nun hat er sein Muth kühlet / in meinem Blute roth /
Manch Stand des Reichs solchs fühlet / Ach du gerechter Gott /
Ein Spiegel bin ich worden / der ganken weiten Welt /
In Angst vnd Noth verdorben / Gott machts wies Ihm gefelt.

9.
Jetzt sieht man Mönch vnd Pfaffen / an stat der Damens
wehrt /
Die ihren Hohmuth schaffen / stiftten nichts guts auff Erd /
Wo solch Bnziesfer nisset / da ist es gut gewest /
Durchs Teuffels Trug vnd Listen / wirds bald ein Huren Nest.

10.
Ihr edlen Teutschen Helden / Thut doch die Augen auff /
Es wird euch numehr gelten / Tret doch einmal zu Hauff /
Gott wird euch Beystand leisten / wie Er versprochen hat /
Das Schmeichlen vnd das Gleisnen / schafft nun kein Nutz
noch Rath.

11.
Ihr edlen Damen freye / die ihr noch vbrig seyd /
An denen ist die Reye / setzt alle Furcht bey seit
Ob schon mein Gart ist worden / ein wüster oder Plaz
Bleibt mir doch unverdorben / Gottes Wort / mein Seelen
Schatz.

12.
Herr Gott ohn deinen Willen / gschicht nichts auff dieser
Welt /
Dein Urtheil zu erfüllen / machs wie es dir gefelt /

Wir

Wir habens wol verdienet/ vmb deine Gerechtigkeit/
Lass vns werden versühnet/ durch dein Barmhertigkeit.

13.

Damit wil ich beschliessen / mein gar erbärmlich End/
Mit grossem Blutvergiessen/ mach ich mein Testament.
Diss Blut sol Zeugnis geben/ vor Gottes Angesicht/
O Herr nach diesem Leben/ Gib vns das ewige Licht.

E N D



Vc 4000

ULB Halle 3
001 928 04X



sb

1077





FAX M

Die M

Allen Evang
den in Teutschla
dabey wol umbzue
Motiven was den S
Stadt zu begeben.
wie es in der
be

Mit angeheng
Testame

Ach D

Gedr

R-

he

än-
/ sich
enden
selbige
den/

chten

22

21

